

靈寶領教濟度金書卷之二百十七 音五

洞微高士開光啟若真人等 全真後

靈寶通玄弘教水南先生林 靈真編

科儀立成品樂用

設醮開啓祝幕儀

法事

上香

臣聞帝車中運需三極以均恩聖慈旁調遍
十華而衍慶欲惠徽於真御庸感格於靈旂
盡罄精誠先殫懇禱以今恭焚真香遙瞻供
養

太上无極大道中天大聖北斗高上玉皇尊
帝北斗太微玉帝北斗玄卿大帝北斗陽明
太尉府玉皇九晨君北斗上宰府巨門星君
北斗司空府祿存真人星君北斗遊擊府文
曲玄冥星君北斗斗君府廉貞丹元星君北
斗太常府武曲北極星君北斗上帝府破軍
天關星君北斗玉帝府外輔星君北斗真人
府內弼星君二帝聖后元君九皇夫人丸陰
內妃天罡萬真節度奎光帝君三台華蓋星

君斗中玄曹道德官君北極四聖真君三天
元素真君中天元惠真君豁落璇璣諸大將
軍天罡萬丈大神王解厄掌式諸靈官等畢
陀羅二仙使者左右綉水使者通事舍人斗
中九省九府丞相真人金童玉女仙吏斗中

千乘萬騎仙官真吏本靖經錄法部諸省府
院司將吏兵馬本派祖玄真師列位真人經
籍度師列位真人城隍社令本家土地司命
六神四直玉文功曹三界直符使者監醮香
官直壇土地防禦神祇應感一切真靈仗此

寶香普伸供養香乃玉華散景九炁含煙香
雲密羅逕衝九天侍香金童傳言玉女為臣
通真上聞帝前令臣所啟感賜如言以今奉
為齋主崇建齋克卜今宵修設清醮一
座延奉仙真希殫款謝敢望靈光洞朗道炁

羅敷鶴馭鸞駉絡繹齊臨於若落龍駢虎騎
翩翩俱下於玄虛監一縷之芹忱効三華之
葵獻壇場告備班序齊周恭對道前關行法
事

灑淨

玄靈感應天尊
詣掌醮司上香

其焚香上啓中天門下掌醮司真君醮筵朔
衛一切真靈仰冀隆寬俯垂監映以今奉為
未修設清醮一座若于答謝斗府高真切慮
樊籠塵境豈同清淨仙鄉鋪設難周徒招謹
責欲望聖慈特為神化即俾層層金玉品
珍奇一如藥珠宴集之供庶格真存俯錫啟
饗干冒聖聰不勝虔禱之至

宣呪

厨開六甲服御天儀九真光耀紫垣璇璣
伶華朗徹鈞天旌麾龍燈鳳燭變化靈飛
碧挑紫柰琅璫瑤芝霞漿雲饌玉掌金彝
真靈神運三辰彰施層層簇列關芳呈奇
金童玉女瓊爵瑤卮七元宴樂九府真隨
降福凡庶萬慶紛枝

玄靈感應天尊

詣降聖司

其焚香上啓中天門下降聖司真君四直功
曹三界使者傳言奏事內外真靈仰冀隆寬

俯垂監映以今奉為其人修設清醮一座分答謝斗府高真切慮紛葩濁境豈同曲密華房感格難周徒招罪考欲望聖慈特為過請即俾九真俯降萬騎齊臨一如明霞朝會之榮庶拜天光獲通真款干冒聖慈不勝傾俟之至

宣呪

天衢霄映青炁白雲紫光素輝鸞旂鳳茵翩翩羽蓋玉曜金真虹梁九萬鶴駕迴旋豁落濛濛旌葆繽紛千乘萬騎雨集雲奔功曹綉衣帔朱羽巾普照黃道異香飛玄前驅虎御後擁龍輶昭明真監俯察精虔流慶壇界福祉綿綿

玄靈感應天尊

華夏入醮筵

轉經儀

法事入壇 燒香頌

按人各恭信

三皈依

志心皈依

十方道寶當願眾生起心回向一切信禮

志心皈依

十方經寶當願眾生心開悟解受持轉誦

志心皈依

十方師寶當願眾生度上法橋無有滯碍

具位恭誠惶誠恐稽首頓首謹焚寶香遙瞻

供養

太上元極斗極祖師元始天尊斗極玄師靈寶天尊斗極宗師道德天尊昊天玉皇上帝

北極紫微大帝斗中高上玉皇尊星君太微

玉帝北極玄卿大帝君中天大聖北斗九晨

皇上帝君九皇夫人九陰內妃天罡萬真節

度奎光大帝斗中三台華蓋星君二十八宿

星君六十甲子星君道德玄曹官君聖眾玄

中大法師真君三天大法師真君中天九省

諸相丈人左右綉衣使者擎羊陀羅使者四

直玉文功曹通事舍人斗中千乘萬騎一切

真靈仗此寶香普伸供養仰冀洪慈俯垂省

錄巨闡五行共稟仰中樞網紀之司七政同

科專左垣鈞衡之任合天地神靈而騰御統

人民品物以裁成移度三圖紀瓊章之妙密迴元九道彰金簡之希夷至矣神功宏哉聖化自龍輿俯臨於玉局而鶴駕仰扣於琅音迴死注生羅瓊燈之照耀消災度厄崇瑤式之加臨遂傳正教於八紘斯煥真經於六合

巍巍功德真敬禮而聖護持赫赫神靈鬼潛消而精伏匿宏闡解謝之門聿啓懺祈之路可奉真宗肯入邪見今齋主某修奉某齋乞於齋次轉誦某經普滌愆非克昌祿壽臣等澄心淪性滌慮凝神肅五體以皈依檢五官而嘯詠恭願玄雲流布聖日昭回勅金童玉女以開函寶花天雨宣使者將軍而啓韞玉籙空浮道德之官君衛嚴豁落之真靈翊護十華清蕩三際消平容臣等異口同音調聲正氣空歌振響騰道炁以彌羅梵唱流明混靈光而洞煥即使齋主某千災不滌萬福來臻集一十五應驗於家庭無災無障解二十四厄難於身命延福延生門庭春到以熙熙眷序陽和而侃侃歲時晏樂晝夜安寧人各運心平坐如法

平坐讚 請轉寶經

舉經題 轉經畢

結經

具位臣某重炷寶香虔誠供養

虛皇大道妙有高尊真天三皇大帝中天北

斗九晨皇上道星君九皇夫人九陰內妃斗

中千乘萬騎一切真靈同此寶香普伸供養

臣聞尊帝二星標空常而飛步璇璣七曜移

節度以參稽天綱推豁落之常地紀定奇儀

之變測靈禽於掌內金緯旁加告驛馬於身

中玉杓端御妙而益妙玄之又玄故聖運開

劫於赤明而真經流傳於永壽誦之者萬罪

消滅潛擁護其精神詠之者千殃蕩除密翊

扶其步武福德立降禎祥可期以今奉為

崇建某齋謹以齋次誦詠某經臣等莫不持

十戒以稱心仗三元而護性舒徐演奧周十

通之玄功容與通靈敷一乘之妙道瓊音逸

響寶韻飛華伏願某罪業消除災衰洗蕩福

壽資命居然常保於利貞善果臻身至矣克

期於安泰絲羅協吉桑梓均歡稽首皈依聞

經讚諒

三闡經

聞經已後惟願眾生萬罪蕩除善芽增長

聞經已後惟願眾生深入法門皈依信禮

聞經已後惟願眾生永斷執迷常皈正道

設醮儀

入壇如式

請稱法位

具位臣某與臨壇官眾等謹同誠上啓

太上元極大道斗中高上玉皇尊帝太微玉

帝北極玄卿大帝中天大聖北斗九晨皇上

道星君九皇夫人九陰內妃斗中天罡萬真

節度奎光大帝斗中三台華蓋星君斗中玄

曹道德諸君六十甲子星君斗極四聖真君

三天大法師真君斗中豁落璇璣諸大將軍

斗中黑煞威烈行綱都副統兵大將軍擊羊

陀羅二仙使者左右綉衣使者通事舍人九

省九府丞相真人斗中千乘萬騎仙官神吏

本靖經錄法部諸省府院司將吏兵馬本派

祖玄真師列位真人經籍度師列位真人本

屬城隍司主者當境土地里域真官四直功

曹三界符使醮筵內外一切威靈臣聞碧落

開光建七元於北極玄虛應化統萬象於中

樞運帝車而節度四時調聖瑟以裁成庶政

仰承閭闔俯仰御崑崙語其妙則魂魄飛登扣

其玄則空常變化星橋穩駕雲闕高參示皈

真知命之方極注福消災之道監觀有翼感

應無違臣切切瞻天依依望聖駒騰暗光念

日涉於千愆蟻磨回旋恐時鍾於萬累爰建

璇璣之齋法肆頌豁落之崇壇潔已精修們

心懺謝仰荷慈觀之監映獲聆釐事之慶成

恭卜今宵燭陳淪祭伏望九靈潛契一炁孔

昭鶴駕鸞騶縹緲下臨於黃道龍旂羽蓋翻

翻來御於紫垣旁羅道德之官君後從威烈

之將吏不違懇禱恪副歡迎臣下情無任激

切屏營之至謹稽首再拜奏請

請聖

初獻

具位臣某謹重誠上啓

三清上聖斗府羣真三界萬靈十方真宰醮

延應感一切威靈臣聞幹運中天探陰陽金木水土之德照臨下土為天地日月江河海之元植華表以建勾陳映駉樞而領蕃衛分野攸係駕銀河於三十六禽寒暑斯分列金井於七十二候凡受形於黃混悉稟命於

紫樞玄造昭昭丹衷翼翼以今齋主某潔蠲葵志疏淪茅心念走俗抗塵傷危機而風動乘非履過蹈禁網以時行雖下土之賦形實上穹之委悉不思性命之當貴惟覺形骸之可驕天惡盈而福謙懼紫黑業道集虛而受益宜露丹忱故建齋醮以種善根為精懺祈而消惡對壇崇三級肅羽葆以朝元陞列八門羅旌幢而拱極龍壁致皈依之悃鳳縉鋪懇告之忱百拜陳誠一心首過果沐穹蒼之監曲歌東赤之私戴德無終承恩罔極輒壯瀕繫之禮少旌葵藿之忱寓敬丹毫謄詞青牘具有彙文謹當敷奏

宣詞

忱恂既露聰聽允昭黍稷非馨借致栗絲之敬茅茨不剪冒陳綿施之儀伏願列聖居歆

高真委監珠英泛玉間梵炁以流明翠掌浮金隨步虛而激響月磬奏九韶之韻雲鶴傳萬舞之容顯秩瓊筵光凝瑤炬不勝激切之至謹伸亞獻

亞獻

具位臣某謹重誠上啓

虛皇大道高真妙有三皇上帝中天大聖北斗九晨星上道星君斗府玄曹一切真宰威靈臣聞七政裁成定黃圖之休咎九皇臨制承紫極之機祥既昭昭濟下以傾光耳赫赫受中而賦質今齋主某擎拳謝過頂踵酬恩肘步膝行既懺穢之無數心剴膽澀復傾倒之莫遺伏願紫絳紛飛丹綸鼓動罪無小大均削落於簡書過有願微悉勾銷於簿錄絕意外無虞之擾圓心中有造之榮惟精惟悉

惟神居然混合曰福曰祿曰壽樂只綿洪發碧梧翠竹之舒華標綠栢蒼松之挺秀香眉舉按人事熙熙坐膝扶床天倫侃侃文獻茂箕裘之業詩書培絃誦之聲九祖七玄朱陵證品五親三族青極流華四時均詠於熙熙

八節咸皈於蕩蕩次願臣等祥光照耀塵翳蠲消好道希仙常見天關之紫炁修真入聖永延地軸之青芒金花不老以優游玉樹長春而安樂黃庭日永爐凝偃月之輝丹谷春融館襲明霞之耀如蒙丹懇允荷玄思上願

覆載清寧儀璘輝耀風雲藏靜草木蕃鮮垂甘露於八埏湧醴泉於九軌敷生龍畝三農騰擊壤之歌威振邊陲四塞息鳴弓之警靜綠林於方域鞠育草於園扉野無鴻鴈之憂朝有鳳凰之喜飛潛動植各樂生生人鬼龍仙均陶化化臣無任激切之至謹伸終獻

終獻

臣謹重誠上啓
道經師三寶天尊昊天三皇上帝中天大聖北斗九晨星上道星君斗府神仙醮進真率

臣聞三熏三沐撻饗帝之寅恭再拜再言極事天之庸敬一念既殫於奏對九皇諒監於敷陳以今香冷金輝燈殘燭焰鳳簾息琳琅之韻龍坡收縹緲之音月淡河澄覺霓旌之欲返參橫斗轉瞻霄布之將還臣控挽無從

瞻依徒切下情不勝攀戀之至謹稽首奉送

回軒頌

出壇

靈寶領教濟度金書卷之二百十七

靈寶領教濟度金書卷之二百十八 畫六

洞微高士開光教苦真人蒙金其授

靈寶通玄弘救水南先生林靈真編

科儀立成品 玄寶經儀 道場用

宿啓儀

啓堂頌

各禮師存念如法

宣衛靈呪

東方

九炁青天明星大神煥照東鄉洞映九門

轉燭陽光掃穢除氛開明童子號曰玄卿

備衛我軒上對帝君收魔束妖討捕兇羣

奉承正道赤書玉文九天符命攝龍驛傳

普天安鎮我得飛仙

南方

三炁丹天煥景浮光熒星轉燭洞照太陽

上有赤精合契虛皇開明童子號曰華房

總統火兵備守玉堂斬邪束妖剪截魔王

北帝所承風火莫當流鈴交換翊衛壇場

正道流行敢有巴狂我享上功坐運魁罡

億劫長存保天無疆

西方

七炁素天太白流精光耀金門洞照太冥

中有素皇號曰帝靈保神安鎮衛我身形

斷絕邪源王道正明宮殿整肅三景齊并

道合自然飛昇紫庭靈寶符命普惠萬生

元皇正炁來合我身功加一切天地咸寧

北方

五炁玄天元始徘徊辰星煥爛光耀太微

黑靈尊神號曰層威統冠飛天仙裙羽衣

備衛五門檢精捕非敢有干試豁落斬摧

玉符所告神鎮八威邪門閉塞正道明開

映照我身三光同輝策空駕浮舉形仙飛

中央

一炁黃天調理乾坤陶鑄陰陽總統玄真

鎮星吐輝流煥九天開明童子號曰天璘

元炁陽精焰上朱煙洞照天下及臣等身

百邪推落殺鬼萬千中山神呪普天使然

五靈安鎮身飛上仙
鳴法鼓二十四通